

中華民國六年九月印行

復蘇里間錄

姑幕蒲郎述

MG

K258.4

6



3 1799 5447 8


復辟見聞錄

凡例

姑幕蒲郎述

- 一 政變之頃鄙人僑居京師每日就見聞所及隨筆記載故名見聞錄專重事實不尙論斷卽友朋問答之詞不作一誑語
- 一 倉卒脫稿不加潤飾文字荒陋閱者諒之
- 一 此次政變著述家及野史家必有鉅製問世敢貢所知聊備採擇
- 一 拙著政變索隱及人物短評二種應附本書之後俟脫稿後刊印就政

復辟見聞錄



復辟見聞錄

姑幕蒲郎述

中華民國六年七月一日爲丁巳五月十三日也曉夢未醒家人促予起謂長江巡閱使張勳擁清宣統帝復辟矣余疑駭參半乃乘車至同里沈君所坐客已滿亟詢其事適周君自外至持某報傳單載清廷諭旨其文曰朕不幸以冲齡繼承大業煢煢在疚未堪多難辛亥變起我孝定景皇后至德深仁不忍民生塗炭毅然以祖宗勦垂之重億兆生靈之命付託前閣臣袁世凱設臨時政府推讓政權公諸天下冀以息爭弭亂民得安居乃國體自改共和以來紛爭無已迭起干戈強劫暴斂賄賂公行歲入增至四萬萬而仍患不足外債增出十餘萬萬而有加無已海內囂然喪其樂生之氣使我孝定景皇后不得已遜政恤民之舉轉以重苦吾民此誠我孝定景皇后初衷所不及料在天之靈惻痛而難安者而朕深居宮禁日夜禱天傍徨飲泣不知所出者也今者復以黨爭激成兵禍天下洶洶久莫能定共和解體補救已窮據張勳

馮國璋陸榮廷等以國本動搖人心思舊合詞奏請復辟以拯生靈又據瞿鴻禨等爲國勢岌危人心渙散合詞奏請御極聽政以順天人又據黎元洪奏請奉還大政以惠中國而拯生民各等語覽奏情詞懇切實深痛懼既不敢以天下存亡之大責輕任於冲人微藐之躬又不忍以一姓禍福之讐言遂置億兆生靈於不顧權衡重輕天人交迫不得已允如所奏於宣統九年五月十三日臨朝聽政收回大權與民更始自今以往以綱常名教爲精神之憲法以禮義廉恥收潰決之人心上下以至誠相感不徒恃法守爲維繫之資政令以懲怗爲心不得以國本爲嘗試之具况當此萬象虛耗元氣垂竭存亡絕續之交朕臨深履薄固不敢有樂爲君稍自縱逸爾大小臣工尤當精白乃心滌除舊染息息以民瘼爲念民生留一分元氣卽爲國家延一息命脉庶幾危亡可救感召天庥所有興復初政亟應興革諸大端條舉如下一欽遵德宗景皇帝諭旨大權統於朝廷庶政公諸輿論定爲大清帝國善法列

國君主立憲政體一皇室經費仍照所定每年四百萬元數目按年撥用不得絲毫增加一懍遵本朝祖制親貴不得干預政事一寔行融化滿漢畛域所有以前一切滿蒙官缺已經裁撤者概不復設至通婚易俗等事並着所司條議具奏一自宣統九年五月本日本日以前凡與東西各國正式簽定條約及已付債款合同一律繼續有效一民國所行印花稅一項應即廢止以除民困其餘苛細雜捐並着各省督撫查明奏請分別裁撤一民國刑律不適國情應即廢除暫以宣統初年頒定現行刑律爲準一禁除黨派惡習其從前政治罪犯概予赦免倘有自棄於民而擾亂治安者朕不敢赦一凡我臣民無論已否剪髮遵照宣統三年九月諭旨悉聽其便凡此九條誓共遵守皇天后土寔鑒臨之將此通諭知之。又本日黎元洪奏請奉還國政籲懇復御大統一摺據稱該員因兵變被脅盜竊大位謬領國事無濟時艱並歷陳改建共和諸多弊害奏請復御大統以拯生靈自請待罪有司等語覽奏情詞悱

側出於至誠從亂既非本懷歸政尤明大義際此國勢危岌大局飄搖竟能作吾民親上之先定中國救亡之策厥功甚偉深孚朕心黎元洪着錫封爲一等公以彰殊典尙其欽承朕命永荷天庥。又興復伊始特設內閣議政大臣以資贊襄而專責成並設閣丞二員其餘京外員缺均暫照宣統初年官制辦理其現任文武大小官員均着照常供職。以張勳王士珍陳寶琛梁敦彥劉廷琛袁大化張鎮芳均爲內閣議政大臣。以萬樞栻胡嗣瑗爲內閣閣丞。以梁敦彥兼外部尙書張鎮芳兼度支部尙書。以王士珍爲參謀部大臣。以雷震春爲陸軍部尙書。以朱家寶爲民政部尙書未到任以前吳炳湘署理。設弼德院以徐世昌爲院長以康有爲爲副院長。以張勳爲直隸總督北洋大臣並留京辦事。以馮國璋爲兩江總督南洋大臣。以陸榮廷爲兩廣總督。以曹錕爲直隸巡撫。以齊耀琳爲江蘇巡撫。以倪嗣冲爲安徽巡撫。以張懷芝爲山東巡撫。以閻錫山爲山西巡撫。

• 以趙倜爲河南巡撫。以李純爲江西巡撫。以譚延闓爲湖南巡撫。以楊善德爲浙江巡撫。以陳炳焜爲廣東巡撫。以譚浩明爲廣西巡撫。以王占元爲湖北巡撫。以李厚基爲福建巡撫。以唐繼堯爲雲南巡撫。以劉顯世爲貴州巡撫。以楊增新爲新疆巡撫。以張廣建爲甘肅巡撫。以張作霖爲奉天巡撫。以孟恩遠爲吉林巡撫。以許蘭洲爲黑龍江巡撫。以劉存厚爲四川巡撫。以陳樹藩爲陝西巡撫。以姜桂題爲熱河都統。以王廷楨爲江北提督。以盧永祥爲江南提督。以張敬堯爲長江水師提督。是日諭旨署名者僅動一人而已。溯自國體改革後。每省設都督一省長一取軍民分治之義。民國三年前。總統袁世凱改都督曰將軍。改省長曰巡按使。五年六月前。總統黎元洪繼任。改將軍爲督軍。巡按使仍爲省長。今則中外官名皆規舊制矣。



張勳馮國璋陸榮廷倪嗣冲張懷芝等奏請復辟文曰竊維治國以綱紀爲先救時以根本爲重我朝開基忠厚聖相承立教則首尙人倫敷政則勤求民隱是以皇靈赫濯敬者懷若帝天化澤涵濡愛者戴如父母雖經捻髮寇氛之巨卒賴二三大臣効忠疆場用能削平禍亂弭我不基蓋仁澤入人既深而王綱又足以維繫之也廿載以來學者醉心歐化奸民結集潢池兩者相資遂成辛亥之變孝定景皇后不忍以一姓之尊榮罹萬民於塗炭勉循所請詔設臨時政府原冀惠安黎庶止息干戈豈知根本動搖竟以安民之心助彼厲民之虐彼時臣勳臣國璋等孤軍血戰莫克回天臣嗣冲臣懷芝等雖力遏妖氛卒難盪決貽憂君國寢饋難安忠憤填胸積年成痼然不敢不仰承廟略倖冀昇平蒙難艱貞於茲七載乃共和實行以後上下皆以黨賄爲爭端各便私圖以貪濟暴道德淪喪民怨沸騰內外紛呶迄無寧歲蒼黎凋瘵逃死無門此實非孝定景皇后遜政之初心我皇上所當收回政權實行

安民以仰承先志者也。臣等伏查列強之世，非建設鞏固帝國，不足以圖存此義。近爲各國所主張，尤深合吾民之心理。以中國之皇王神聖，代有留貽規復典章，易於反掌。而我皇上英姿天挺，聖學日昭。雖在冲齡，睿逾往聖。况當杭樞之運，曾無七嚙之驚。天殆默佑，聖躬以宏濟艱難。俾延無疆之祚，而吾民迭嬰荼毒。尤後，自蘇臣等蒿目時艱，痛心天禍。外察各國旁觀之論，內審民國真實之情。靡不謂共和政體，不適吾民。實不能復以四百兆人民，猷骨吸髓之餘，生供數十政客，毀瓦畫墁之兒戲。非后何戴窮則呼天，臣等反復密商，公同盟誓。謹代表二十二省軍民真意，恭請皇上收回政權，復御宸極。爲五族子臣之主，定宇內一統之規。臣等內外軍民誓共效命，竭忠保乂。皇室伏懇我皇上大慈至德，俯允所請，天下幸甚。

瞿鴻禨奏請御極聽政

鴻禨係大學士軍機大臣罷職家居辛亥改革後隱於海上人鮮知者前朝遺老也

文曰竊維我朝忠厚開基，列祖列宗，繼緒相承，無不以勤政愛民爲謨。

烈心傳之本而臣民涵濡化澤逾二百年亦無不祝奕禩之綿長樂生成於覆幬此我國上下人心之真象也辛亥難作奸宄乘機孝定景皇後不忍以一姓之尊榮致萬民之塗炭勉徇遜政冀遏亂源當日輿情雖痛憾政府之蒙蔽聖聰以貽憂君國亦窺見委曲求濟爲朝廷不得已之苦心乃自臨時政府組織以來天下騷然迄無甯歲名曰共和政體而上自舉總統下至選議員中及於改組閣員無不自私黨相爭持以賄賂相取予是以府閣議員之際黨與賄交爭而貪盜苛刻以濟之故影響動及於全國以致財源枯竭四民流離國本動搖危如累卵猶復昌言廢孔蔑棄彝倫潰禮義之大防以倡爲禽獸神怒民怨不可終朝揆諸宣統初元不啻自水深火熱之中以望衽席此固非景皇后遜政之初志抑豈我皇上愛民之本心乎臣等謹查中國以君主立國越四千年而三綱五常乃君主立國之本蓋積家爲國造端倫常人倫有兄弟而序其長幼必先繫子於父人倫有朋友而析及男女必別繫婦

於夫納五常於三綱之中卽以君綱揭其領大綱既振小綱皆舉斯亂萌無自而生故真能愛國之民鮮不愛君而真能愛民之君卽爲愛國反是者今日之亂而已矣七年以來創鉅痛深內外臣民咸思舊主而我皇上英資天挺聖學日昭本已饑已溺之懷應天視民視之運此誠千載而一遇也臣等仰受國恩竊懷私憤以主憂臣辱之義奔走海內徒以事權莫屬無補涓埃耿耿此心積憂如疚竊見前署兩江督臣張勳等忠肝義膽炳若日星迭與徃復密商亦以事機未成葵忱莫遂茲值黨爭激烈震盪全邦共和不良盡人皆見臣張勳倪嗣冲及各疆臣等規模遠大倡建義旗同德同心共匡王室修桓文之盛業上掃周宗殪澆漓之妖氛誓光夏物臣等無狀夙夜瘁心久懷捧日之誠幸慰回天之願風聲所播天下臚歡伏乞睿斷早施親裁大政上以繼謨烈於列聖卽下以拯水火於神州俟後來蘇慰雲霓之渴望維皇建極燿日月之重光天下幸甚萬世幸甚

張勳及王士珍江朝宗陳光遠李進才蔡成勳張永成劉金標劉富有張錫元吳長植李魁元蕭安國陸錦吳炳湘凡十五人通電各省文曰自頃政象譎奇中原鼎沸蒙兵未解南耗漸驚政府幾等贅旒疲氓迄無安枕忱內訌之孔亟虞外侮之紛爭全國飄搖糜知所屆勳惟治國猶之治病必先洞其癥結而後攻達易爲功衛國猶之衛身必先定其心君而後清寧可長保既同處厝火積薪之會當愈勵揮戈返日之忠不敢不掬此血誠爲天下正言以舌溯自辛亥武昌兵變叛改共和綱紀墮積老成絕跡暴民橫恣宵小把持獎盜魁爲偉人祀死囚爲烈士議會倚亂民爲後盾閣員恃私黨爲護符以濫借外債爲理財以剝削民脂爲裕課以壓抑善良爲自治以摧折耆宿爲開通或廣布謠言而號爲輿論或密行輸款而託爲外交無非恃賣國之工借立法爲舞法之具馴至昌言廢孔立召神恫恃禮害羣率由獸行以故道德淪喪法度凌夷匪黨縱橫餓莩載道一農之產既厄於訛詐復厄於誅求一商

之資非耗於官捐卽耗於盜劫凡在位者侵吞賄賂交濟其奸名爲民國而不知有民稱爲國民而不知有國至今日民窮財盡而國本亦不免動搖莫非國體不良遂至此極卽此次政爭伊始不過中央略失其平若在紀綱稍振之時焉有轆轤不解之慮乃竟兵連方鎮險象環生一二日瀾漫大地迄今內蒙獨立尙未取消西南亂機時虞竊發國會雖經解散政府久聽虛懸總理既爲內外所不承仍卽靦然通告就職政令所及不出都門於時退職議員公詆總統之言爲僞令推原禍始實以共和爲之厲階且國體既號共和總統必須選舉權利所在人懷倖心而選舉之期又僅以五年爲限五年更一總統則一大亂一年或數月更一總理則一小亂選舉無已時亂亦無已時小民何辜動罹荼毒以視君主世及猶得享數百年或數十年之幸福者相距何啻天淵利病較然何能曲諱或有謂國體既定共和倘輕予更張恐滋紛擾不若擁護現任總統或另舉繼任總統之爲便者不知總統違法之說已

爲天下詬病之資聲譽既隳威信亦失強爲擁護終不自安倘日後迫以陷險之機詎若目前完其全身之術愛人以德取害從輕自不必伴予推崇轉傷忠厚至若另行推選刻期繼任詎敢謂海內魁碩並世絕無其人然在位者地醜德齊莫能相下在野者資輕力薄孰敢率從縱欲別揀元良一時亦難其選蓋總統之職位高權重有其才而無其德往者既時蓄野心有其德無而其才繼者乃徒供牽鼻重以南北趨嚮不無異同選在北則南爭選在南則北爭爭端相尋而國已非其國矣默察時勢人情與其襲共和之虛名取滅亡之實禍何如屏除黨見改建一鞏固帝國以競存於列強之間此義近爲東西各國所主張全球既無異議中國本爲數千年君主之制聖賢繼踵代有留貽制治之方較各國爲尤順然則爲時勢計莫如規復君主爲名教計更莫如擁戴舊君此心此理八表攸同伏思大清忠厚開基救民水火其得天下之正遠邁漢唐二祖七宗以聖繼聖我聖祖仁皇帝聖神文武冠絕古今

歷傳至我德宗景皇帝時勢多艱憂勤尤亟試考史乘載筆歷朝愛民之政如普免錢糧疊頒內帑多爲曠古所無卽至辛亥用兵孝定景皇  
后寧舍一姓之尊榮不忍萬民之塗炭仁慈至意淪浹人心海內喁喁  
謳思不已千百年後平心論事謂爲亡國夫豈其然昔少康以臣靡之  
師而光夏物宣王以召伯之輔而復周宗功在千秋至今不朽前者朝  
廷遜政另置臨時政府原謂試行共和之後足以弭亂綏民今共和已  
閱六年而變亂相尋未已仍以諭旨收回政柄實與初旨相符以視夏  
周中興尤屬事半功倍我皇上冲齡典學遵時養晦國內迭經大亂而  
深宮七鬯無驚近且聖學日昭德音四被可知天佑清祚特畀我皇上  
以非常睿智庶應運而施其撥亂反正之功祖澤靈長於茲益顯勳等  
枕戈勵志六載於茲橫覽中原陸沉滋懼比乃猝逢時變來會上京竊  
以謂暫偷一日之安自不如速定萬年之計徵之於古既如彼徵之於  
今又如此大勢所嚮天與人歸此固非勳等一人之私言實中外人心



之公理業已熟商內外文武衆議僉同謹於本日合詞奏請皇上復辟以植國本而固人心庶幾上有以仰慰列聖之靈下有以俯慰羣生之望風聲所樹海內景從凡我同胞皆屬先朝舊臣受恩深重卽軍民人等亦皆食毛踐土世沐生成接電後應卽遵用正朔懸挂龍旗國難方殷時乎不再及今淬厲尙有可爲本羣下尊王愛國之至心定大清國阜民康之鴻業凡百君子當共鑒之

時聚觀未竟有某客揚言曰辛亥革命於茲六年民窮財盡火熱水深以中華禮教之邦而一旦藩籬盡撤人心潰決其弊害所致皆共和政體不適國情爲之厲階語至此某客憤然曰以艱難締造之民國而斷送於一二武臣驅我四萬萬國民盡爲臣僕是可忍孰不可忍互相辯詰紛呶無已余嘆曰禍患迫於眉睫豈盈廷聚訟時耶吾儕小人但蘄室家之安所獲已多他非遑計同坐聞予言默不作答而辯亦遽止先是對德宣戰案經政府提出兩院爲議員所反對內閣一再疏通議

李不果外交要政日久虛懸於是有公民團數千人(當民國二年選舉多人集議院要求舉袁世凱爲總統者)刊布傳單圍繞衆議院強迫通過情勢洶洶不可遏抑議員且有被毆者咸懷不平迭起質問而府院之爭亦大起總統黎元洪乃免國務總理段祺瑞職而設京師警備司令命王士珍江朝宗陳光遠分任之吉林督軍孟恩遠等有修正憲法條文之請詞意激昂政府拒勿納其時十三省督軍以軍事會議集都下至是乃相約出都往徐州就商於勳蓋自前總統袁世凱病歿元洪繼任祺瑞爲國務總理恢復約法恢復國會於是有徐州會議以詆毀閣員及兩院議士爲其宣言而內幕隱秘有非外人所能知者今之諸督軍繼踵而往則所謂徐州會議者已再見矣既至徐推勳爲盟長而安徽省長倪嗣冲首先發難號召全國謂元首違法議院專橫非會師首都迫散議院不足以前隱患於是各軍相繼出發集師畿輔都下震驚復設參謀處於天津推雷震春爲參謀長指揮聯軍且謀舉海陸大元帥爲政府樹敵

旋爲某巨公所尼而元帥之議遂寢元洪以衆怒難犯急電召勳勳乃率所部定武軍二千人北上分布於萬莊廊房間爲京奉鐵道東岸也勳既至津遣使入告請解散國會爲退兵計元洪不得已徇其請國務總理伍廷芳指爲違法堅不副署乃以步軍統領江朝宗代其職而副署之而解散國會之令下矣時李經羲已被命爲總理迴翔津沽進退維谷至是乃偕勳入都通告就職內閣且未成立而復辟之事起當勳之未至也教育總長范源濂密語元洪謂勳夙抱復辟之義若率師內入必有大舉宜爲之備元洪聽其說而未從其謀其時復有前國務總理熊希齡之通電略謂外交糾紛既鮮良策財政匱乏羅掘已窮國體之不可動搖復辟之不利清室危言讜論反復詳明識者殆早窺其微矣噫溯洄往事惆悵今茲雖貽詞費之譏或補裨官之缺

十四日政府公報更名曰內閣官報載清廷諭旨此次保衛京師奠安邦社所有在京軍警人等異常出力着賞內帑十萬元交民政部陸軍

部分別發給。又陳寶琛奏請收回成命一摺該大臣輔弼朕躬忠誠夙著值茲邦家再造百度待興正賴宏抒讜謨益資啓沃尙其欽承朕命毋得固辭。又瞿鴻禨升允均着授爲大學士馮國璋陸榮廷均着授爲參預政務大臣康有爲着賞給頭品頂戴王士珍梁敦彥均着加恩在紫禁城內賞坐二人肩輿康有爲着加恩在紫禁城內騎馬雷震春着加恩在紫禁城內騎馬。以沈曾植爲學部尙書。以薩鎮冰爲海軍部尙書。以勞乃宣爲法部尙書。以李盛鐸爲農工商部尙書。以詹天佑爲郵傳部尙書。以貢桑諾爾布爲理藩部尙書。以張曾敝爲都察院都御史。以胡思敬溫肅爲都察院副都御史。以龍濟光爲廣東水師提督。以吳光新爲湖南提督。以李經邁爲外務部左侍郎高而謙爲右侍郎。以吳炳湘爲民政部左侍郎張志潭爲右侍郎。以楊壽枏爲度支部左侍郎黃承恩爲右侍郎。以李瑞清爲學部左侍郎

陳曾壽爲右侍郎。以田文烈爲陸軍部左侍郎。崔祥奎爲右侍郎。以江庸爲法部左侍郎。王乃徵爲右侍郎。以錢能訓爲農工商部左侍郎。趙椿年爲右侍郎。以阮忠樞爲郵傳部左侍郎。陳毅爲右侍郎。以蔣作賓爲參謀副大臣。以江朝宗爲步軍統領。以李思浩爲鹽務署長。以鈕傳善爲全國烟酒督辦。以辜湯生爲外務部左丞。謝介石爲右丞。以程經世爲左參議。劉洪禧爲右參議。以曾習經爲度支部左丞。李經野爲右丞。以章棧爲學部左丞。黎湛枝爲右丞。以顧瑗爲農工商部右丞。以吳炳湘爲京師巡警總廳廳丞。以江朝宗爲京師稅務監督。以王達爲順天府府尹。以李慶璋爲直隸布政使。是日諭旨署名者爲張勳。王士珍。梁敦彥。劉廷琛。張鎮芳。凡五入午。後出正陽門。過大柵欄。復繞道交民巷。至東城。見內外居民商肆皆懸黃龍旗。爲前清國徽也。

東西長安門中華門天安門及四眼井街戶部街之便道口有定武軍

十人及十二師之步兵八人荷戈梭巡

東西車站及郵政電報電話局皆爲定武軍士所駐守警廳則派員檢查書函

十五日清帝因御極受賀文武百僚黎明入宮皆御前朝冠服

大臣入內者皆率衛士數人而定武軍尤多興復伊始內廷鳩工修葺冀復舊制暫以上書房爲議政處養心殿爲召見臣僚之所

內閣官報載本日諭旨近年國事紛更民生艱苦橫徵暴斂杼柚屢空軫念窮黎殊深憫惻所有宣統九年以前民間舊欠錢糧概予豁免以抒積困著各省督撫都統轉飭所屬切實奉行並卽敬謹刊刻謄黃通行曉諭咸使周知以示朝廷加惠閭閻之至意。又收令親民歷代所重近年以來綱紀廢弛仕路混淆治民轉以殃民執法或先飭法羣怨所積呼籲無門將欲體恤民生端在修明吏治著各督撫都統認真考核凡有勤政愛民治行卓著者隨時切實保薦候旨擢用其貪劣不職

各員並著從嚴糾劾毋稍姑息徇隱總期官方整肅治具先張以副朕子惠元元之意。又貢桑諾爾布片奏百日未滿俟服闋再行到任等語現在時局艱難百務待興著卽先行到部任事以副倚畀。又陳毅奏懇請收回成命一摺現值國基初奠正賴羣材匡翊尙非守經之時該侍郎夙効忠誠務當顧念時艱先行到部辦事毋得固辭。又鈕傳善著賞給侍郎銜。以陳光遠爲直隸提督。以范國璋爲浙江提督。以蔡成勳爲福建提督。以達壽爲理藩部左侍郎。顧瑗爲右侍郎。以李進才爲陸軍副都統並充京師軍警執法處督辦。以劉金標爲陸軍第十三師師長。李得勝爲陸軍步隊第二十五旅旅長。晨起六弟虞來謂予曰國體變更南歸之計已決七弟已於昨晨行矣兄意若何余戲語之曰弟高官出處宜審慎若兄下僚去就何足商確第以資斧告匱遷徙匪易耳虞婉歎而去乃以行李寄頓予處午後訪某前次長詢以見聞公喟然曰政治不良爲世話病無可諱言

第逆世界之潮流啓隣邦之窺伺軒然大波將隨之而起余謂中外贊同類有定約何致中梗公笑而勿答余詰之曰昨有告我者某鉅卿慈公出山有諸公曰有之余夙疾未瘳已作書謝之矣

自清帝復辟後盛傳總統黎元洪已出府邸而莫知所適未幾得日本使館布告大總統帶侍衛武官陸軍中將唐仲寅秘書劉鍾秀及從者一名於七月二日午後九時半不預先通知突至日本使館域內之使館武隨員齋藤少將官舍請其保護身命日本使館認爲不得已之事情並顧及國際通義決定作相當之保護卽以使館域內之營房暫充黎總統居所黎總統在日使館時日本公使館絕對不允其作政治的活動云云先是有法國醫士某往來公府屢爲總統治疾是夕因乘車至東交民巷入法國醫院而以隨行者蔣中將作賓不解法語故變計至日使館也

總統既至日使館府邸中衛士數百人皆移駐南苑惟指揮使徐邦傑



及日本顧問青木中將留守

大清門在正陽門後觀瞻嚴肅辛亥國體改革更名曰中華門茲則規復舊稱仍以漢蒙合璧文字顏其額噫長安道上冠蓋如雲過斯門者感想爲何如耶

十六日清廷諭旨昨經明發諭旨採用君主立憲政體將以闡揚先訓效法列強查立憲先進諸邦首重憲法而行政機關而外咸有國會以監督政府方茲邦基再奠亟應制定憲法召集國會以立根本之大計而懋薄海之人心惟憲法應如何規定國會應如何組織仍當切實討論俾有良效而無流弊卽著各督撫推舉老成公正精通法理諳悉國情之員每省三人尅期來京將憲法國會諸大端慎籌妥議以期早日告成用副朕厲行憲政之至意。又蒙古爲國屏蔽河山帶礪垂三百年自辛亥遜政以來中原雲擾統馭無方以致潰決頻仍兵爭未息眷懷舊主無路自通朕甚憫焉現在鼎祚重新與天下更始該王公等其

各率爾舊服佐我皇圖用世世爲國家翼蔽之賴所有蒙古應行興革事宜着理藩部妥議具奏隨時敷設加意撫綏以慰其歸誠効順之意將此通諭知之。又邦家再造經緯萬端輔導助勳實資耆獻連日疊頒明諭凡屬先朝舊臣海內碩德在朕所知均已先後簡任惟人材所出不拘一途或操行優長可爲矜式或治績純美夙著循良或文章爾雅堪爲廊廟之資或法律精深堪備典章之選或發明新理學具專長或講求技術富有經驗乃至鄉里獨行山林隱逸倘有一節之長朕無不量才擢用著京外各大臣留心訪察隨時開列事實繕單具奏以備任使用副朕側席旁求之至意。又太傅大學士徐世昌碩德耆年公忠體國敷歷內外譽望攸隆朕以冲齡興復方始典學蒞政輔導需賢昨已降旨特簡爲弼德院長該大學士忠愛夙著且與朕違離日久以朕眷注之切諒亦依戀至殷自必聞命立行尅期就道第念先朝勳舊允宜禮遇特殊茲略仿古人君安車蒲輪優禮耆賢之義著郵傳部迅

備專車並派曹秉章馳赴天津前往迎送務期即日來京朝夕納誨匡弼朕躬用副惓惓延跂之厚望。又袁大化着加恩賞在紫禁城內騎馬。又田文烈未到任以前陸軍部左侍郎着陸錦署理。又鄭孝胥秦炳直陳際唐吳慶坻趙啓麟華世奎翁斌孫均着迅速來京預備召見。以張人駿周馥爲協辦大學士。以岑春煊趙爾巽陳夔龍呂海寰鄒嘉來張英麟鐵良吳郁生馮煦朱祖謀胡建樞安維峻王寶田爲弼德院顧問大臣。以馬良安爲甘肅提督以馬福祥爲固原提督。以陸錦爲陸軍部左丞劉恩源爲右丞。以吳兆毅爲陸軍部左參議韓運章爲右參議。

是日訪同里董莊二公不值知已於是日聯袂出都矣大理審計兩院前車馬頓稀僅見僕隸蹀躞戶外狀極索寞

訪鹽務署長李公不遇隸人告予曰署長已往津門予徘徊間適鮑君至詢之果確鮑謂予曰中央政費恃鹽稅餘款爲大宗今丁恩氏已藉

口於國體未定靳而不與矣杼柚其空司農仰屋世無卜式爲之奈何  
總統黎元洪既避居日使館外部尙書梁敦彥造館求見館員以黎總  
統政躬不豫養疴謝客婉言辭之

十七日前國務總理段祺瑞以勳倡行復辟憤極而號乃於十五日夜  
分偕前司法總長梁啓超前教育總長湯化龍至馬廠商諸第八師師  
長李長泰與師問罪就直隸省長公署設討逆軍司令部以徐樹錚李  
長泰爲參贊靳雲鵬爲參議張志潭爲秘書曾毓雋掌軍需丁士源爲  
交涉長陶雲鵬爲副官長軍事參議則有傅良佐曲同豐顧問則有王  
克敏吳鼎昌呂調元等風聲所樹響應者日衆於是都下人士奔走相  
告戚戚然有憂色

前司法總長梁啓超文章泰斗爲世所宗先是對德宣戰案啓超以在  
野政客洋洋數千言闡發其義非具世界眼光者安能道一字茲聞復  
辟之耗乃馳書海內擢數勳罪而申言利害所謂春秋之筆嚴於斧鉞

也文曰昊天不弔國生虺孽復辟逆謀竟實現於光天化日之下夫以民國之官吏臣民而公然叛國順逆所在無俟鞫訊但今既逆燄薰天簧鼓牢籠恫脅之述無所不用其極逆氛所播羣聽或淆啓超不敢自荒言責謹就其利害成敗之數爲我國民痛陳之倡帝政者首藉口於共和政治成績之不良夫近年政治之不良何容爲諱然其造因多端尸咎者寔在人而不在治苟非各界各派之人咸有覺悟洗心革面則雖歲更其國體而於政治之改良何與者若曰建帝號則政自肅則清季政象何若我國民應未健忘今蔽日罪共和過去罪將焉蔽况前此承守成餘蔭雖委裘猶可苟安今則悍帥狡士挾天子以令諸侯謂此而可以善政則莽卓之朝應成郵治似斯持論毋乃欺天帝政論者又動以現今之黨派軋轢爲口實夫黨爭之劇吾儕亦曷嘗不疾首痛心然須知既以憲政號於國中則黨別寔無可逃避容之則漸納於軌蹙之則反揚其波今定策擁立者豈能舉全國青年才智之士而盡阬之

阮之不盡黨固在也阮而盡又焉知來者之不如今也今之主動者以淺薄之憑藉而謬師操懿之故智處文明之世運而夢想雍乾之操術叩以立憲之義意舉朝莫之能解使其政府幸而有一年數月之壽命則其政象吾敢爲預卜曰桓立朱溫時代之專制而已夫專制結果必產革命桓立朱溫寧有令終所難堪者則國家之元氣與人民之微命也然使果得一年數月之苟安則吾民或且姑爲容忍殊不知立國於今世非閉關所有自存苟不自廁於國際團體之林則國寔不成爲國今我民國各友邦所承認者也當思前此易帝而民此承認果幾經艱難而始得之者今易民而帝其得承認也艱辛將益倍於前當此國交中斷之期間將誰與立於大地者且此次首造逆謀之人非貪黷無厭之武夫卽大言不慚之書生於政局甘苦毫無所知他勿具論卽如中央政費每月七百餘萬向仰給於鹽課餘款及各省解款不足則借債以補之試問現在北京之滑稽內閣對於此三項收入有何把握聞此

次之惡作劇有某國牽綫於幕內許出其銀行存款供揮霍茲事信否誠不敢知藉曰信也爲數幾何一兩月澗可立待耳又彼董卓朱溫者在今日氣蓋一世志得意滿縱其逆軍橫行輦轂餉糈視諸軍獨厚而必索現銀氣燄視諸軍獨高而動肆陵轢以有教育有紀律之軍隊與彼共處一城而謂可相安無事以歷旬月其誰信之是故就外交論就財政論就軍事論此滑稽政府皆絕無可以苟延性命之理雖舉國人士噤若寒蟬南北羣帥袒手壁上而彼之稔惡自斃吾敢決其不逾兩月最可痛者則天下萬國將謂我國無復一人其縮軍符膺疆寄者乃如犬馬凡能參養我而鞭箠我者卽憎服而乞憐於其下則此恥其不可洗滌矣最可憂者迨董卓朱溫自斃之時小之喋血都門大之流寇數省而羣帥中曾無一人有戡亂之力勢必重勞隣封越俎而代則此國其真永劫不復矣啟超一介書生手無寸鐵舍口誅筆伐外何能爲役且明知樊籠之下言出禍隨徒以義之所在不能有所憚而安於緘

默抑天下故多風骨之士又安見不有聞吾言而興者也抑啓超猶有欲贅陳者一年以來黨派主奴之見其詭譎變幻出人意表啓超深痛極慟向兩方要人苦口忠告勸其各自覺悟勿馳極端以生反動在吾則既竭吾才聲嘶力盡曾不蒙省察而急進派之策士惟日從事於挑撥搆煽引甲抵乙謂可以操縱利用以遂其排擠之私而結果乃造成今日之局今有董卓誰實何進今有朱溫誰實崔允啓超前此曲突徒薪之論適以供若曹含沙喫血之資亦既痛憤積中誓將緘結終古今親顛覆之巢復吐在喉之鯁知我罪我固所不辭來軫徃車願質明哲按啓超此電作於七月一日也

國務總理李經羲於復辟宣詔後亟往訪動聞人不爲通乃夤夜出都通電全國文曰六月三十日午夜奇變中外詫爲情理所無蓋以張勳在津在京接見耆碩酬對外使通電各省宣告軍人罔不以維持元首鞏固國體爲言又當諸難已解組閣將成卽有異謀無可藉口也此變



成於三四日內禍自外來若無強援微服入京又無要人證明外交可恃雖有僉王密圖傾覆計已失敗難惑動心當外援來甫一日閉伏幕室羲得密告疑之然無形跡可執惟圖間接消弭嗣見外援移寓報者謂別有政爭不至發生急變不圖卽夕禍起兵動時贛館笙譟猶未撤也羲於是夕兩鐘聞警王聘卿得報先一小時奔馳止兵退而復集羲急赴江朝宗宅營救王江已被勦強邀赴會經羲後至嚴關拒入黎明王江回述動言無可挽回在坐諸奸則條條分辯謂外交決不干涉無異承認各省多數復電同意惟財政尙須籌備議畢勦卽入宮宣詔云云次日羲欲與勦面論屢通不報羣小疑怒及羲自恨無力反抗遂於七月二日夜盡出險到津聞芝泉已赴馬廠誓師馳書求伸義憤經羲智昏力薄負罪無極復有何顏求明心跡惟欲及吾目未瞑一述經過眞象庶國人洞知羲罪所在不至誤於訛傳則經羲雖死之日猶生之年張勳夙抱復辟宗旨羲非不知惟聞近論改變去冬蛛絲馬跡復經

一度消滅月前各省發難徐州一會羣帥推爲盟長羲知動性夸大不爲維持必爲主張其時大局糾紛會師關下賢碩皆若引嫌設竟排難無人久恐禍生不測羲心目中罔以爲繫鈴解鈴非動莫屬又欲動以非常名譽打消夙昔主張顯則鞏固國基免致疆土破裂陰則保全清室使存永遠尊榮衷曲所懷未敢輕發嗣聞公府有電諭以調停又聞動頗自負調人謂非奉有明令無權取重同列正在馳電詢商勳使過津復爲得意并述李盛鐸復命還京亦以所要上白府令雖下仍未滿意既懷挾前兩種目的遂以用人不疑之說貢之公府二次令下勳復遲行羲疑而遣問便中密探心志答詞則謂夙願無諱惟時機太不合宜不忍愛而反害我一六十老翁何力久輔冲人萬一不幸危險太重雖有勸警決不可從羲向未與勳共事悞信爲明通爽直既以忠愛爲心決不忍爲仇報實不虞包藏狡謀利攬大權終爲僉王煽惑一朝反覆如此尤痛心者世太保陳師傅老成忠主力勸寢謀太妃中亦有泣

阻者足見清室毫無此心乃皆被勳輩揮斥強制獨行設國人不諒清室無力禦暴之苦衷事後橫生猜議多所削損不獨糜勳百體不足蔽辜卽如羲輩舊僚目覩慘禍力不能救而且躬與其事設有不測生何以見世人死何以對宗祖泣血椎心惟望事定之日重誅羲輩在事者以謝薄海深察清室受倂根因無損我故君毫末也目下義師雲集合力包圍勿使挾負而逃兼開一面之網容其窮蹙知歸毋殘京闕卽或困鬥負隅不難尅期恢復從此南轅北轍消除意見人心果皆悔禍庶幾劫運可回庸劣如羲月來含垢忍尤本欲求達兩種目的向我國民謝罪而去今乃種因結果凡百事與願違共和可觀傷尅已多清室卽存感想非昔凡屬在事之人無不躬負重隱羲則息影已久抱疚猶深至於有議羲假力固位之說此僅個人人格關係何暇置辯惟念兼旬以來爲曲全大局多受困難如赴京堅約同行商明只認維持不能就職已曲諒矣乃到京一難未解卽立強以任事告以羣情未洽信用何

存勳仍一意孤行斥義怯餒後見義苦商聘卿不允復日以無政府見責義揣勢難於單騎出京萬不得已始有任期三月之宣告張勳言行不顧信義全無通電任意誣妄授權羣小爲之賣友罪小誤國罪大今證明張勳爲造惡構亂險人無論對何方均皆罪不容誅至於復辟萬不能行於今日時代世有通論無待義言義雖始終不預密謀力圖消弭而識闇受欺事敗垂成尙復何說經義惟望諸公聯合芝帥共伸撻伐早奠民國速救清室義雖衰朽敢辭奔越再此電恐難遍達諸公接覽後請賜照轉連日困於勢力範圍發電稍遲揮涕茹辛伏維亮察按此電披露於十七日也

都下人士往津避亂者日以千萬計京奉火車坐爲之塞季弟偕戚友南歸予送至車站幾無立足地行將登車忽聞萬莊廊房間已有戰事黃村軌道中斷欲行不果均廢然返

各國公使會議於荷蘭使館以京奉鐵道在廊房萬莊之間忽被毀壞

京津之交通頓絕違背辛丑條約詰問外部並發嚴重通告其文曰兩軍應遵守千九百零一年之議定書關於北京與海濱間之交通保證不准施行何等破壞之行動否則協商各國公使認爲必要時應自當交通保證之任噫責言至矣咄咄逼人是豈諉過之詞特爲應付之術耶旋由荷蘭領袖公使鳩工修築之

本日駐京各國守備隊長特開會議由日英美法意等十國隊長出席決議如下

(一)若有必要時卽就豫定之防範配置

(二)日美兩國各增兵一連

十八日清廷御旨前以興復伊始特簡內閣議政大臣本爲一時權宜之計亟應建設完全責任內閣以期實行君主立憲政體徐世昌著以太傅大學士輔政卽日來京贊畫一切并籌備召集國會修訂憲法諸事宜以奠國基而宏新政。又中國交通兩銀行發行兌換券向由國

家擔保通用現在國體回復該兩銀行兌換券仍由國家照舊擔保公私款項一律行使着度支部郵傳部督飭銀行維持信用并著步軍統領巡警廳廳丞順天府府尹迅卽出示曉諭商民一體通用毋得任意折扣以維金融。又陳邦瑞周樹模沈瑜慶丁寶銓朱益濬均着迅速來京陛見。以度支部尙書張鎮芳兼鹽務署督辦郵傳部尙書詹天佑未到任以前梁敦彥兼署。以孫寶琦充督辦稅務大臣蔡廷幹爲副大臣李思浩未到任以前嚴璩署鹽務署署長兼稽核所總辦。以張茂燭爲中國銀行正監督曹銳爲副監督。以熙彥爲馬蘭鎮總兵仍兼管內務府大臣

討逆軍既設司令部於天津前國務總理段祺瑞爲總司令前奉天將軍段芝貴爲東路司令直隸督軍曹錕爲西路司令大舉北伐一時如魯如豫如晉如奉如浙如皖如鄂如贛聞風奔赴不旬日而集者六萬人軍容之盛震耀中外勳軍二千餘人欲與之交戰是非臆臂當車哉

當馬廠視師之日祺瑞以共和軍總司令名義痛哭流涕申大義於天下曰嗚呼天降鞠凶國生奇變逆賊張勳以凶狡之資乘時盜柄竟有本月一日之事顛覆國命震擾京師天宇晦霾神人同憤該逆出身竈養行穢性頑便佞希榮漸躋顯位自入民國阻兵要津顯抗國定之服章婪索法外之餉糈軍饑凶橫行旅裹足誅求無藝私橐充盈凡茲稔惡天下共聞植時多艱久稽顯戮比以世變洊迫政局小紛陽託調停之名隱爲篡竊之備要挾總統明令敦召遂率其醜類直犯京師自其啓行伊始及駐京以來屢次馳電宣言猶以擁護共和爲口寔逮國會既散各軍既退忽背信誓橫造逆謀據其所發表文件一切託以上諭一若出自幼主之本懷再三臚舉奏摺一若由於羣情之擁戴夷攷其實悉屬讐言當是日夜十二時該逆張勳忽集其凶黨勒召都中軍警長官二十餘人列戟會議動叱咤命令迫衆雷同旋即繫康有爲闖入宮禁強爲擁戴世中堂續叩頭力爭血流滅鼻瑾瑜兩太妃痛哭求免

幾不欲生清帝子身冲齡豈能禦此強暴竟遭誣脅實可哀憐該僞諭中橫捏我黎大總統馮副總統及陸巡閱使之奏詞尤爲可駭我大總統手親共和誓與終始兩日以來雖在樊籠猶迭以電話手書密達祺瑞謂雖見幽決不從逆責以速圖光復勿庸顧忌我副總統一見僞諭卽賜馳電謂被誣捏有死不承由此例推則陸巡閱使聯奏之虛構亦不煩言而決所謂奏摺所謂上諭者皆張動及其凶黨數人密室篝燈構此空中樓閣而公然騰諸官書欺罔天下自昔神奸巨盜勸進之表九錫之文其優孟兒戲未有若今日之甚者也該逆勳以不忘故主謬託於忠愛夫我輩今固服勞民國強半皆曾仕先朝故主之戀誰則讓人然正惟懷感恩圖報之誠益當守愛人以德之訓昔人有言長星勸爾一杯酒世豈有萬年天子哉曠觀史乘迭興迭仆者幾何代幾何姓矣帝王之家豈有一焉能得好結局前清代有令辟遺愛在民天厚其報使繼之者不復家天下而公天下因得優待條件勒諸憲章帶山礪



河永永無極吾輩非臣事他姓絕無失節之嫌前清能永享殊榮卽食舊臣之報仁至義盡中外共欽今謂必復辟而始爲忠耶張勳食民國之祿於茲六年必今始忠則前日之不忠孰甚昔既不忠於先朝今復不忠於民國劉牢之一人三反狗彘將不食矣謂必復辟而始爲愛耶凡愛人者必不忍陷人於危以非我族類之嫌丁一姓不再與之運處羣治之世而以一人爲衆矢之的危孰甚焉張勳雖有天魔之力豈能翻歷史成案建設萬劫不亡之朝代既早晚必出於再亡及其再亡欲求今日之條件則安可得豈惟不得恐幼主不保首領而清室子孫且無噍類矣清室果何負於張勳而必欲藉手殄滅之而始爲快豈惟民國之公敵亦清室之大罪人也張勳僞諭又藉口於民國不能善政謂必建帝號乃可爲國家久安長治之計張勳何人乃敢罔談政治使帝制而可以得良政治則辛亥之役何以生焉博觀萬國歷史變遷之跡由帝制變共和而獲治安者既見之矣由共和返帝制而獲治安者未

之前聞法蘭西三復之而三革之卒至一千八百七十一年確立共和國乃大定而既擾攘八十年國之元氣消耗盡矣國體者譬猶樹之有根也植樹而屢搖其根小則萎黃大則枯死故凡破壞國體者皆召亂取亡之道也防亂不給救亡不暇而曰吾將藉此以改良政治將誰欺欺天乎復辟之遺害於清室也如彼不利於國家也如此內之不特非清帝之自動而孀妃耆傅且不勝其疾首痛心外之不特非羣公勸進而比戶編氓各不相謀而噴目切齒逆賊張勳果何所爲何所恃而出此彼見其辦子軍橫行徐兗亦既數年國人優容而隱忍之自謂人莫敢誰何遂乃忽起野心挾天子以令諸侯因此剗除異已廣布腹心爪牙於各省掃蕩全國有教育有紀律之軍隊而使之受支配於彼之土匪軍之下然後設文網以坑賢士箝天下之口清帝方令玩於彼股掌之上及其時則取而代之耳罪浮於董卓而凶甚於朱溫此而不討則中國其爲無男子矣祺瑞罷政旬月幸獲息肩本思稍事潛修不復

預聞時政忽搆此變羣情鼎沸副總統及各督軍省長馳電督責相屬於道愛國之士夫望治之商民好義之軍旅環集責備義正詞嚴祺瑞撫躬循省繞室徬徨既久奉職於民國不能視民國之覆亡且曾箴仕於先朝亦當救先朝之狼狽謹於昨夜分視師馬廠今晨開軍官會議六師之衆僉然同聲誓與共和並命不共逆賊戴天爲謀行師指臂之便謬推祺瑞爲討逆總司令義之所在不敢或辭部署完尅日入衛查該逆張勳此次倡逆既類瘋狂又同兒戲彼昌言事前與各省督軍均已接洽試問我同胞僚友果有曾預逆謀者乎彼又言已得外交團同意而使館中人見其中風狂走之態度來相詰言財政則國庫無一錢之蓄而蠻兵獨優其餉且給現銀言軍紀則辮子橫行都門而國軍與之雜處日蒙凌轢數其閣僚則老朽頑舊幾榻烟霞問其謀主則巧語花言一羣鸚鵡似此而謂能濟大事天下古今甯有是理卽微義師亦當自斃所不忍者則京國之民倒懸待解所可懼者則友邦疑駭

將啓責言祺瑞用是劍及履及率先勇進以爲國民去此蝥賊區區患忠當蒙共諒該逆發難本乘國民之所未及防都中軍警各界突然莫審所由來在勢力無從應付且當逆餒薰天之際爲保持市面秩序不能不投鼠忌器隱忍未討理亦宜然本軍伐罪弔民除逆賊張勳外一無所問凡我舊侶勿用以脅從自疑其有志切同仇宜詣本總司令部商受方略事定後酬庸之典固有成規若其有意附逆敢抗義旗常刑所懸亦難曲庇至於清室遜讓之德久而彌新今茲構衅禍由張勳冲帝既未與聞師保尤明大義所有皇室優待條件仍當永泐成憲世世不渝以著我國民念舊酬功全始全終之美祺瑞一俟大難戡定之後卽當迅解兵柄復歸田里敬候政府重事建設迅集立法機關刷新政治現象則多難興邦國家其永賴之謹此布告天下咸使聞知並先期通電各省文曰天禍中國變亂相尋張勳懷抱野心假調停時局爲名阻兵京國至昨夜遂有推翻國體之奇變竊謂國體者國之所以與立

也定之匪易既定後而屢圖變置其害之中於國家者實不可勝言况以今日民智日開民氣日昌之世而欲以一姓威嚴馴伏億兆尤爲事理所萬不能致民國肇建前清明察世界大勢推誠遜讓民懷舊德優待條件勒爲成憲使永避政治上之怨府而長保名義上之尊榮宗廟享之子孫保之歷觀有史以來二十餘姓帝王之結局其安善未有逮前清者也今張勳等以個人權位慾望之私悍然犯大不韙以倡此逆謀思欲效法莽卓挾幼君以制天下竟據黎元洪奏稱改稱共和諸多弊害懇復御大統以拯生靈等語擅發僞諭橫逆至此中外震驚若曰爲國家耶夫安有君主專制之政而尙能生存於今之世者其必釀成四海鼎沸蓋可斷言而各友邦之承認民國於今五年今覆雨翻雲我國人雖不惜以國爲戲在友邦則豈能與吾同戲者內部分爭之結局勢非召外人干涉不止國運眞從茲斬矣若曰爲清室耶清帝冲齡高拱絕無利天下之心其保傅大臣方日以居高履危爲大戒今茲之舉

出於僞脅天下共聞歷考史乘自古安有不亡之朝代前清得以優待終古既爲曠古所無豈可更置諸巖壙使其爲再度之傾覆以至於盡祺瑞罷斥以來本不敢復與聞國事惟念辛亥締造伊始祺瑞不敏實從領軍諸君子後共促其成既已久服勞於民國不能坐視民國之傾覆分裂而不一援且亦曾受恩於前朝更不忍聽前朝爲匪人所利用以陷於自滅情義所在死守不渝諸公皆國之干城各膺重寄際茲奇變義憤當同爲國家計自必矢有死無二之誠爲清室計當久明愛人以德之義伏望戮力同心戡茲大難祺瑞雖衰朽亦當執鞭以從其後也敢布腹心伏維鑒察復傳檄徐州軍士曰張勳造逆傾覆民國危擾前清不義不忠神人同憤本司令承近畿諸軍及各省督軍公推暫領今職已派段上將軍芝貴爲東路司令率三縱隊進駐廊房派曹錕督軍爲西路司令率四縱隊進駐良鄉咸候師期會同進剿都中原有軍警多於逆軍十倍此輩皆吾舊侶咸密來輸款靜候指揮順逆之義既

殊衆寡之數懸絕逆動頭懸闕下且夕間事耳義師初起復檄告天下謂罪止張勳他無所問誠以此次倡逆惟動一人軍士義取服從附亂豈其本意脅從罔治古訓聿昭反禍爲功懋賞斯在昨據都中探報稱勳所帶駐京軍隊對於此次逆舉多敢怒而不敢言其妻其姪叩頭力諫幾遭鎗斃又據徐海道尹李慶璋呈稱在徐定武軍各將校尤多深明大義正擬聯電力爭爭而無效則宣告與逆動脫離關係等語本總司令采聞之下嘉欣殊深逆動此次舉動求諸史乘實與董卓朱溫鼎足而三復辟實非清帝本意當逆動上殿逼脅時世中堂叩頭流血瑜太妃痛不欲生蓋知其事必無成恐緣此失優待條件試環顧京城及近畿勁旅幾何全國勁旅又幾何逆動以區區數千人之衆深入重地反全國人之心理冒天下之大不韙當文明之世而欲效古代挾天子令諸侯之事立於必敗之地而獨囂囂然自鳴得意其悍逆固可憤其愚蠢亦可憐定武軍者非張勳之軍民國之軍也受民國餉精爲民國

守土張勳昔爲民國將帥則忠於張勳卽所以忠於國家張勳今爲民國罪人則國家所養之軍豈能隨人作賊諸將校不乏有勇知方之士凡茲大義諒所共明今南北義師雲集咸噴目切齒請尅日合圍淮徐犁掃巢穴本總司令以爲論上天好生之德固不能不教而誅况諸將士本非造亂之人更安忍一網而盡爲此剗告諸將校等宜審順逆之分察成敗之勢審核既明斷行宜勇卽諄諭士卒捧籍歸誠一面卽合電逆勳數其罪而與之告絕則事平之後本總司令當牒告政府其士卒則仍列尺籍爲國干城其將校則按照勳勞涯頰懋賞若猶執迷不悟怙惡不悛蝨賊在所必除國法安能曲貸以一徐州而當天下之師雖孫吳復生何能爲役逆勳在京師懸首彙街之日亦卽定武軍在徐州玉石俱盡之時諸將校順逆去就轉移於一念之微而或爲功首或爲罪魁或流芳百世或遺臭萬載禍福兩途惟所自擇事機一髮悔難追今特露布此意咸使聞知當勳之被召率數千人入衛而所部定



武軍三萬人猶駐徐州故有是檄

直隸督軍曹錕以西路討逆司令名義傳檄都下謂民國成立於今六載五族共和人民無擾乃張勳以南京之逃臣保皇之餘孽膽敢猝發逆謀背叛民國名爲擁戴宣統實則自私自利迫總統而退位強清帝以登極種種逆謀無非爲己本督軍維護共和誓保民國正以憲法未安力謀改良該逆竟敢挾天子以令諸侯叛民國而稱大臣非倒共和直欲亡國自應同伸大義合力進討茲經各省公舉國務總理段爲總司令段上將芝貴爲東路司令本督軍爲西路司令聯合南北各省共發義師尅期北上掃除妖氛以奠大局除電京內各軍保護外人力維治安外合行出示布告爲此告仰軍民人等一體知悉須知此次復辟係被張勳逼迫並非清室本意仍可照常保護張軍爲數甚夥亦不乏洞明大義之人倘能倒戈一律優待自告之後各處軍民人等均各照常安業毋得自相驚擾致干未便一切法令亦各遵守民國章程辦理

倘敢故違卽以從逆論其各凜凜毋違特告

自京奉鐵道毀於黃村人民避亂者咸思取道京漢南下而未幾京漢車忽聞停駛一時人心震懼有不可終日之勢

十九日清廷諭旨以吳鏡孫爲民政部左丞吳敬修爲右丞。以吳學廉爲度支部左丞宋名璋爲右丞

外交團以黃村廊房間戰事已起於是日本駐津守備隊一連美兵九十六人法兵八人安南兵十六人各携武裝先後入京防衛使館及其僑民

江蘇督軍副總統馮國璋代總統職就任南京先是總統黎元洪避居使館卽遣密使至津三電各省。其一本日張巡閱使率兵入城實行復辟斷絕交通派梁鼎芬等來府游說元洪嚴詞拒絕誓不承認副總統擁護共和當必有善後之策特聞。其二天不悔禍復辟實行聞本日清室上諭有元洪奏請歸政等語不勝駭異吾國由專制爲共和實

出五族人民之公意元洪受國民付託之重自當始終民國不知其他特此奉聞藉免誤會。其三次政變猝生致搖國體元洪負疚民國哀痛何窮已於本月冬日特任段芝泉總理國事並電請馮副總統依法代行職權在副總統未經正式代理以前一切機宜統由段總理便宜處理所有印信文件業經送津請段總理暫行攝護並設法轉送副座呈請接收再頃者公府衛隊猝被撤換催交三海元洪亦即移居醫院此後一切救國大計務請諸君商承馮副總統段總理合力進行臨電翹企不盡區區於是國璋布告就職通電各省謂張勳背叛民國變起京師茲奉到黎大總統冬日電開此次政變猝生致搖國體元洪不德統御無方負疚國民飲痛已極都中情形日趨險惡元洪既不能執行職權民國勢將中斷我公同受國民重託應請依照約法第四十二條暨大總統選舉法第五條暫行軍府代行政大總統職務目前交通樞絕印綬齎送深虞艱阻現已任命段芝泉爲國務總理并令暫行攝護

設法轉呈此後一切救國大計請我公與芝泉協力進行事機危迫我公義無旁貸臨電翹企不盡區區元洪冬等因又迭據段總理陸巡閱使各省督軍省長各都統各護軍使鎮守使各師長旅長暨各商民人等前後電請依法代理國璋自維薄德鮮能弗克負荷顧念我中華民國政權所寄未可虛懸法律事實兩無可諉與師討逆尤急待統一之令不得已爰於七月六日宣告代理布告原文業經電達所有組織政府事宜已電商段總理在津主持并急圖進兵規復京邑尙祈諸公各竭智能奠安區宇藐躬重寄日夕熒熒惟有誓以赤誠共圖効國而已倘不我棄願賜教言復下討逆之令曰長江巡閱使安徽督軍陸軍上將張勳久膺民國重寄不知竭誠自効阻兵怙勢包藏禍心此次藉命入都陽託調停之名陰行叛逆之事動搖邦本淪陷神京罪惡貫盈敷天同憤張勳應卽褫去本職并褫奪軍職勳位著傳知前敵各軍嚴拿務獲盡法懲治以申法紀而快人心又此次逆賊張勳假名盜國

竊踞神京經國務總理段祺瑞組織討逆軍聲罪致討督師進剿疊控逆氛現已將次合圍盪平之期即在指日所有各省軍隊除業經調遣外均應各駐原防維持地方秩序並諭禁所在軍民人等勿藉端號召致滋紛擾當令下之日動憤恚益甚困獸之鬥其能免乎

二十日清廷諭旨張勳奏稱各省稱兵羣來咎責懇請開去差缺一摺應即准如所請開去內閣議政大臣暨直隸總督兼北洋大臣各差缺其駐京軍隊仍着嚴加約束保持秩序內閣政務即由王士珍等妥慎辦理並着俟徐世昌來京會同籌商善後辦法云云蓋自討逆軍司令部成立各省反對文電日必數至聯軍復漸迫都下故有是諭於是度支部尚書張鎮芳侍郎黃承恩陸軍部尚書雷震春皆請開缺許之以揚壽棟代度支部尚書陸錦代陸軍部尚書是爲復辟後降旨之末日也勳乃通電各省文曰我國自辛亥以還因政體不良之故六年四變迭起戰爭海內困窮人民殄瘁推原禍始罔非共和階之厲也勳以悲

天憫人之懷而作拯溺救焚之計度非君主立憲政體無以順人心而回未劫欲行君主立憲政體則非復予明辟無以定民志而息紛爭此心耿耿天日爲昭所幸氣求聲應吾道不孤凡我同袍各省多與其謀東海河間猶深贊許信使往返俱有可徵前者各省督軍聚議徐州復經商及列諸計畫之一嗣以事機牽阻致有停頓然根本諸義詎能變更現以天人會合倖告成功民不輟耕商不易市龍旗飄漾遍於都城萬衆臚歡咸歌復旦使各省本其原議多數贊同何難再見太平不意一二政客因處地不同遂生門戶之見於是主張歧異各趨極端或故違本心率以意氣相向或反持私見而以專擅見規遽啓兵端集於畿輔人心惶恐輦轂動搖動爲地方治安起見自不能不發兵抵禦戰爭既起勝負難言設竟以此擾及宮廷禍延閭里甚見牽惹交涉喪失利權則誤國之咎當有任之者矣惟念此次舉義之由本以救國濟民爲志決無絲毫權利之私攙於其間既遂初心亟當奉身引退况議政大

臣之設原以與復伊始國會未成內閣無從負責若循常制僅以委諸總理一人未免近於專斷不得已而取合議之制事屬權宜動以樞魯武人濫膺斯選辭而後任方切慚惶爰於本日請旨以徐太傅輔政組織完全內閣召集國會議定憲法以符實行立憲之旨仔肩既卸負責有人當卽面陳辭職其在徐太傅未經莅京以前所有一切閣務統交王聘老暫行經管一俟諸事解決之後卽行率隊回徐但使邦基永定漸躋富強勳亦何求若夫功罪惟有聽諸公論而已敢布腹心謹謝天下讀勳通告一若復辟之議衆贊其成今且食言反汗矣噫謂勳言而信耶我不敢知謂勳言而僞耶其誰能必記者不敏闕疑焉可也勳既辭職江朝宗以步軍統領名義遍發布告現因政局未平客軍雲集所有各軍官長皆係愛國衛民凡我商民均應各安生業如有匪徒造謠生事藉端搶掠定卽捕拏按照土匪擾亂治安律處以極刑決不稍貸各宜懷遵下署新舊歷月日已除宣統年號矣

是日晨起有飛艇浮行空際家人輩咸出戶仰矚警士告予曰此來自航空學校者乃訪某報館記者詢其所聞則曰共和軍遣飛機至清宮擲炸彈三一墜於乾清門傷侍衛一人斃輿夫一人一墜於中正殿一墜於毓慶宮卽清帝讀書處也時清帝年十三喟然歎曰余讀書養晦與世無尤乃強余復登大寶旣非初衷必欲戕及藐躬抑又何耶豈非天乎言罷而泣某師保以溫語慰之午後余至瑞金樓晤西商罕君述飛機事罕曰貴國人任事之勇進步之速足令外人心折者但是語至此適某客排闥入未竟其詞

度支部尙書張鎮芳陸軍部尙書雷震春及第二十八師師長馮德麟乘京奉車出京至豐台爲討逆司令部所偵逮捕以去謂其附和復辟也

二十一日比日以來各省反對文電愈唱愈高而勳持君主立憲議甚力於是叅謀總長王士珍步軍統領江朝宗警察總監吳炳湘前內史



監阮忠樞造動私邸謂清帝退位行將宣詔段軍以六師之衆迫臨城下公若膠持成見則部下健兒必遭屠戮公亦詎能生還耶動答曰吾以死酬志他非所知士珍輩知不可喻乃拂袖去復有某西人夤夜過訪謂事機危岌請以公之妻子畀予將挈之他徙動不從時定武軍參謀長萬繩栳隨動有年動以國士禮待之繩栳感動知遇未嘗離動側亦復再四請而動兀然不動有闔門爲殉之意

列國公使以戰爭苟起京師震動流血之禍不可思議乃開會協議由

荷蘭公使

以本年各國公使

照會步軍統領公署其文曰外交團原不願

干涉中國內政之問題惟現在北京恐發生流血之慘變是以不能不提出免此巨難之方法然據外交團所看最有效力者一面令已經解職之張帥及其兵丁將其武裝交與有責之當局一面令段上將宣言擔保張勳及其所屬決無性命之虞云云噫列國公使以國際之交誼持人道之主義奔走排難而卒不免於巷戰者亦可悲矣

中國交通兩銀行鈔票自停止兌現後價格漸落已閱一年而貨值之昂有加無已以至胼手胝足恃勞力爲生者終日且不獲一飽今復猝遭時變市廛恐慌每鈔一元僅易銅幣七十枚比戶編氓生機殆絕噫民爲邦本本固邦寧使民不聊生而欲久安長治詎可得耶瞻望前途憂心如搗

二十二日都下人士日夕企望者惟元老徐世昌之至以謂調停政變支持危局匪斯人莫屬乃清廷遣使於前外交團敦促於後蒲輪已駕足音杳然兵戎之機促於俄頃矣

動負固之志既堅以西四牌樓西單牌樓公府外壁至中華正陽兩門復向東出南河沿至東華西安兩門一帶之皇牆爲步兵陣地其兵數一千八百餘人蓋定武軍在京者僅二千餘人駐天壇者已一千八百餘人故城中防禦僅數百人矣多寡之數相去天淵勝負之分奚待策卜南河沿爲勳之私邸左右兩岸編列營幕東安門及南北狹巷疊木

石砂囊無數有武裝軍士或十人或二十人內外駐守交通斷絕時見牛車往來輸運皆炮彈及軍用品也

清廷以時機危迫已現瓦解之勢乃遣某員勒往見荷國公使謂復辟之議曩歲卽有持此說進者清室且善辭之今勳所爲宜未預謀至發號施令更非冲帝所知請以斯意普告友邦聞者爲之歎息

外交團以戰爭將起特召集會議照辛丑條約自崇文門起點至石大人胡同止爲保衛界以其地近東交民巷一時多數商民聞風請求推廣界綫而卒不允平日邦人士嘗恨租界之多今乃反嫌其少其不貽笑於友邦者幾希

二十三日討逆軍集於京城內外者約五萬餘人分駐永定彰儀兩門外旌旗蔽天有如火如荼之概居民惶駭人人自危池魚之殃其誰倖免於是步軍統領江朝宗軍警督察長馬龍標巡警總監吳炳湘召集會議凡游緝隊及警兵力任地方治安不預兩方戰事之三君者殆萬

家生佛矣

是日第八師及第十六混成旅由豐台拔隊先後至右安門時已夜半游緝隊守城樓閉門不納司令馮玉祥怒命梯團魚貫而上門乃大啓於是相繼入近畿第一旅旅長張錫元爲共和軍先鋒隊率所部至齊化門游緝隊啓門納之乃登城樓一時居民大恐縱橫奔避秩序幾亂警察總監吳炳湘聞信趨至乃商之錫元退駐朝陽門外

夜已逾午紅十字會得秘密消息係傳自荷蘭公使館者謂張勳負固之志益堅調停罔效必出於武力之解決於是聞者惶惶奔走相告者屬於道未幾則謂共和司令部已正式照會荷使館將於黎明下攻擊之令

二十四日拂曉四點半鐘聞炮聲發自東南余亟披衣出警兵告予曰共和軍已攻城矣幸勿他往余不得已戒婦暨輩閉戶隅坐而射擊之聲再接再厲園中流彈如雨心膽俱落其時交通斷絕街衢無行人惟

見警兵林立而已迨下午兩點半聲稍寂呂某來告曰張勳爲荷蘭公使挾之而去戰事畢矣予詰其何以能至此則曰佩紅十字會徽章可無阻也言罷匆匆去槍砲聲遂寂然計鏖戰十小時之久

共和軍之開始攻擊也安定門則爲第一師彰儀門則爲第三師永定門則爲第八師朝陽門則爲第十一師及第十二師西直門則爲第十三師且有近畿之一二兩旅及山西之混成旅其炮兵陣地在彰儀門之南置山炮四專攻天壇及長安門者月壇置野炮六安定門置野炮十六專攻景山及東華門者

第十三師一旅由德勝門入第一及第二混成旅由阜成門入皆爲攻擊西安門者以景山炮力所阻卒未得下

第十一師及第十二師各遣兩營由朝陽門入至王府井大街攻東華門不得乃於東華門南牆穿穴數十處復移巨炮於絨線胡同直指南河沿卽動私邸全力猛擊亦以防禦甚固急切不得遽進而述者謂勳

之避逸卽此時也

第三師之一旅及混成第一旅圍攻正陽門時勦兵四十五人據城樓置機關槍禦之相持至兩時共和軍乃登肉市西河沿各商店之樓巔及東西車站之貨場三路環擊勢乃不支向大清門退守忽傳勦亡走使館戰始告止而共和軍亦占領正陽門矣

交綏之際勦徘徊池畔談笑指揮見者謂其不改常度殊無悔禍意迨戰爭益烈時已逾午荷蘭國公使於槍林彈雨中乘車至勦所謂共和軍提出條約請偕行至使館商進止勦猶力拒爲荷使強携而行並促其眷屬入法國醫院瀕行之頃勦以文牘置囊中乃積薪自焚其廬雕梁畫棟一炬蕩然過其門者不勝今昔之感

居民蒙戰禍者不可勝計外人因觀戰中彈者則有法兵一人日本兵一人美兵一人美兵且以重傷斃命

紅十字會會員率救護隊分赴內外城各戰地隨時營救兵民獲生全

者不可勝數佛家以慈善爲本普濟衆生吾於斯會信之

匪徒聞風思逞賴軍警防護之力憊伏未起然如甘麵胡同花枝胡同則有服軍士裝者多人持械入民家大肆劫掠絲縷殆盡旋捕戮一二入始皆遠颺夫以紀律嚴明之師乃爲若輩冒託設以僞亂真而隳及軍聲則爲患滋大是在治兵者立法以善其後

戰事既畢客軍蜂屯警廳乃下令戒嚴每晚六時始衝衢要道禁行人往來居民則嚴扃戶牖誠善政也

動既敗亡共和再奠總統黎元洪引咎罪己退志益堅乃通電各省文曰寒電計達頃聞道路流言頗有於總統復職之說竊加揣擬者驚駭何極元洪引咎辭職久有成言皎日懸盟長河表誓此次因故去職付託有人按法既無復位之文揆情豈有還轍之理伏念元洪夙闕裁成叨逢際會求治太急而躓於康莊用人過寬而蔽於輿凡追思罪戾每疚神明國會內閣立國兼資制憲之難集思尤貴當稷下高談之日並

沙中忿語之時縱殫慮以求平尙觸機而卽發而元洪揚湯弭沸膠柱調音既無疏濬之方竟激橫流之禍一也解散國會政出非常縱謂法無明條鄰有先例然而謹守繩墨昭誓山河顧以懼民國之中殤竟至拂初心而改選枯蘆縮水莫遂微忱寡草隨風卒隳特操二也張勳久蓄野心自爲盟主屢以國家多故曲予優容遂至乘瑕隙以激羣藩結要津以徼明令元洪雖持異議卒惑羣言既爲城下之盟復召奪門之變莽蜂螫指引虎糜軀三也大盜移國都市震驚撤侍衛於東堂屯重兵於北闕元洪久經駭浪何畏猶颺顧憂大厦之焚欲擇長城之寄含垢忍辱貯痛停辛進不能登臺授仗以殄凶渠退不能闔室自焚以殉民國縱中興之有託猶內省而滋慙四也輕騎宵征擬居醫院暫脫身於塞庫欲奮翼於澠池迺者閩人不通偵騎交錯遄臻使館得免危機自承複壁之藏轉懷堅冰之懼亦既宣言公使早伍平民雖於國似無錙黍之傷而此身究受羽毛之庇五也凡此愆尤皆難解免一人叢脞



萬姓流離覩鋒鏑而慟傷兵聞鼓鞞而慙宿將合六州而莫鑄投四裔以何辭萬一矜其本心還我初服惟有杜門思過掃地焚香磨濯餘生懺除夙孽寧有辭條之葉仍返林柯墮溷之花再登茵席心肝倘在面目何施且夫謀國必忠愛人以德琴弛則絃改車覆則軌遷若必使負疚之身仍尸高位騰嘲裨海播笑編氓將何以整飭紀綱折衝樽俎稀瓜不堪四摘僵柳不可三眠亡國敗軍又焉用此抑元洪尙有進者國定於一師克在和當興亡繼絕之交爲排難解紛之計正宜恪守法律蠲棄猜嫌况馮總統江淮坐鎮夙得軍心段總理鐘篋不驚再安國本果能舉右挈左提之實寧復有南強北勝之疑至於從前兵諫各省風從雖言愛國之誠究有潰防之慮此次興師討賊心迹已昭何忍執越軌之微瑕掩回天之偉績兩年護國八表齊功公忠旣已同孚法治尤當共勉若復絜短衡長黨同伐異員嶠可到而使之反風宣房欲成而爲之決水茫茫慘黷豈有寧期鼎革以還政爭迭起凡茲兄弟鬩牆之

事皆爲奸雄竊國之資，倘諸夏之偕亡，詎一成不復。難謀此九元洪待罪之軀，屏爲垂涕而道者也。魂雖化枯骨，猶生否劫。荒山越巒，縱薰穴以無歸。不返，據誠感聽，維以告哀。

步軍統領江朝宗補述復辟經過情形爰誌於左

月三十日夜江西同鄉在贛館演劇公譙張勳於時予亦應招在座十時返宅十二時就寢忽得安定門駐守官兵報告有陸軍第二旅軍隊一團叫門入城嗣又得西直門報告有十三師馬步各隊亦請入城請示辦法當即電飭駐守各城門官兵嚴拒一面電詢吳劉兩旅長答甚含混再三斟問吳旅長始答以係走路隊一面電請陳督練光遠李師長進才吳劉兩旅長至宅面詢適參謀王總長匆匆到宅時已一點三十分鐘謂接第一師長蔡成勳專電密報有張勳調隊入城卽夜復辟之耗陳督練李師長亦同時趕至皆稱事非無因於是予急令左翼申

統帶振林至安定門右翼富統帶連瑞至西直門各帶弁兵分頭阻止該軍隊入城一面電稟公府請唐副官仲寅詣上房回明極座正商議間雷震春張鎮芳遣汽車持片邀請赴張勳宅議事予拒而不往有頃張勳復遣軍官四人駕汽車來迎予仍不欲行經王總長勸令同往好得實在消息遂邀陳李俱往至則兵衛森嚴露刃實彈如臨大敵隨帶僕從一概屏止內宅門外不令隨入既入引至密室則見吳旅長劉旅長萬繩栻李慶璋張鎮芳雷震春諸人在座其餘有不識姓名者二人須臾張勳出席首先向予詰問何以拒兵入城不允開門予謂城守係予專責深夜無故召兵入城設與定武軍衝突或有他變擾及治安誰任其咎况前經參陸辦公處議定無故不准軍隊入城非奉有王總長親函圖記不准調隊且事前並未通知焉得怪予之拒絕惟公之調兵究因何故應卽說明張遂將復辟事向予等宣布謂大事已定多數人均已同意如不贊成卽不准走出回顧左右監視予等出入且言寺

色俱厲謂如敢遲延卽以武  
督軍省長是否聽爾號召元首是否同意外交有無把握財政是否足恃且清室平日於復辟一事極不願聞或有閒談及此者必掩耳急走以示決絕萬不可愛而反惡貽冲人以危險害清室之安全違背民國衆怒難犯乃陳說再三張悉置而弗顧氣勢汹汹但謂各省均已電認可前者京外會議全體贊同元首不從卽以強迫行之外交業經梁敦彥接洽財政則有張鎮芳擔任至於清室方面勿勞過問抗論良久幾至決裂雷則要挾尤甚語言激刺張勳勒令予卽速開城予答以既諸般已定又何必調兵入城如用威力迫脅何以服元首國人之心強迫而行必禍生眉睫敢斷言之彼時王總長亦以正言規勸謂茲事體大萬不可冒昧行之致貽後悔語極沈痛而張始終不悟勢將動武予以勸阻無效遂託詞報告爲言約王總長脫身而出陳督練李師長亦藉故走出維時張勳加派李慶璋梁節庵隨同監視同往公府報告復

辟情事予一直陳同王總長請極座速召集軍事會議以武力解決國體事未果行當時極座左右親信人員均知真象而城外之兵亦卒至天明始得入城張勳每告人曰若非江某反對阻兵入城大事不俟天明即大定矣故清室諭旨直至七月一日下午二時始得宣布至張勳所發公電當時並未與在座諸人宣布予更不與聞予不敏不能消弭巨患咎實難辭近閱各報於論記六月三十日夜復辟之事恐未得其真象故將予是日經過之實在情形披露如右

572

